

Մաշտոցի Արձագանգ

Հայաստանեայց Եկեղեցույ Սուրբ Յակոբ Կիրակնօրեայ Դպրոցի ամսաթերթ

Այս թիւով...

Խմբագրական՝
Ինքնաքննութեան իրաչատուկ առիթ

Բուն Բարեկեդան, Արտաքսման,
Տեառնընդառաջ, Անառակին, Տնտեսին,
Միջինք. Փետրուար ամսուան
բացատրական բառարան: Էջ 3

Մեծ Պահք: Էջ 4

Գոհութիւն Աստուծոյ շնորհքին համար:
Էջ 5

Եկեղեցական բառարան: Էջ 6

Խօսքն Աստուծոյ: Էջ 7

Աստուածաշունչը մանուկներու համար.
Ղազարոսին Յարութիւնը: Էջ 8-9-10

Եզակի գիրեր: Էջ 11

Ո՞րն է ճիշդ պատասխանը: Էջ 12-13-
14-15

Կարճ լուրեր կիրակնօրեայէն: Էջ 16

Փետրուար 2008
ԺԵ տարի- թիւ 6



Մի՛ ընէք ոեւէ բան որ
հակառակասիրութենէ կամ
փառասիրութենէ մղուած ըլլայ.
այլ՝ խոնարհ ոգիով՝ ձեր
ընկերները աւելի լաւ
համարեցէք քան դուք ձեզ:
Միայն դուք ձեզ մի՛ մտածէք,
այլ նաեւ՝ ձեր ընկերոջ մասին:

Փիլիպպեցիներուն 2.3-4

Հաւատք

Կրօն

Եկեղեցի

Լեզու

Մշակույթ

Խմբագրական

Ինքնաքննութեան իրաչատուկ առիթ

Քրիստոսի Սուրբ Յարութեան տօնը կանխող յիսուն օրերու վրայ երկարող Մեծ Պահքի շրջանը ծանօթ է ոչ միայն իբրև սննդական կամաւոր զրկանքի շրջան, այլ մանաւանդ իբրև ինքնաքննութեան իրաչատուկ առիթ, ուր հաւատացեալներ յանձնառու կ'ըլլան իրենք իրենց մէջ ամփոփուելու եւ իրենց կեանքի ընթացքին մասին խոկալու: Հոգեւոր մեր կեանքին վրայ կեդրոնանալու ու անոր մասին մտածելու այս առիթին առաջնահերթ նպատակն է քննել մեր հոգին ու ձգտիլ, իբրև անկատար արարածներ, ապրիլ նմանողութեամբ մեր Արարիչին:

Նիւթեղէն աշխարհի վրայ ապրող մարդ արարածը պէտք է գտնէ ձեւը մօտենալու աստուածային օրինակին: Մարդուն Աստուծոյ նմանելու ձեւն է առաքինութիւնը: Բարեգործութիւն, ժուժկալութիւն, անկեղծութիւն, հաւատարմութիւն, համեստութիւն: Այս բոլորը առաքինութեան օրինակներ են որոնց կը ձգտինք բոլորս յուսալով մօտենալ աստուածային անհասանելի կատարելութեան:

Կեանքի ընթացքին կիրարելիք կամ ձեռք ձգելիք առաքինութիւններուն թիւը անհամար է ու անոնցմէ իւրաքանչիւրը՝ համազօր ձեւով կարելոր: Դժուար է հաստատել թէ կարելոր է որ մարդ անկեղծ ըլլայ, նոյնիսկ եթէ նախանձոտ է: Աւելի կարելոր է որ ան ներողամիտ ըլլայ քան՝ խոնարհ: Կարելի չէ առաքինութիւնները ըստ կարելորութեան դասել, ինչպէս նաեւ անկարելի է անոնց միջեւ առաջնահերթութիւններ ստեղծել: Սակայն կարելի է հաստատել թէ կայ առաքինութիւն մը որ միւս բոլորը կը պարփակէ, եւ ամբողջութեամբ սխալ չըլլար հաստատել թէ եթէ այդ մէկ առաքինութիւնը ունենանք միւս բոլորը ինքնաբերաբար գործադրած կ'ըլլանք: Այս ամենէն մեծ առաքինութիւնը սէրն է:

Սիրող անձը ինքնաբերաբար խոնարհ է, հանդարտաբարոյ, համբերող, չի' ծուլանար, չի' գոռոզար, չի' բարկանար, ինչպէս կը հաստատէ Աստուածաշունչը: Յիշենք օրինակները մեր կեանքերէն ներս ուր սիրով կատարուած արարք մը որքա՛ն տարբեր թուած է առ ի պարտականութիւն կատարուած այլ մէկ արարքէ, սիրով տարուած դժուարութիւնը որքա՛ն ավելի հեշտ թուած է քան զայրոյթով ու ընկճուածութեամբ տարուածը: Սէրը ամէն ինչ կը դիւրացնէ, կը մեղմացնէ: Սիրող անձին համար գրեթէ ոչինչ անկարելի է: Այս է պատճառը որուն համար կ'ըսուի թէ բոլոր առաքինութիւններն ալ հաւասարապէս կարելոր են բաց թէ անոնցմէ ամենէն մեծը Սէրն է:

«Մաշտոցի Արձագանգ»
Հայաստանեայց Եկեղեցւոյ Սուրբ Յակոբ Կիրակնօրեայ Դպրոցի ամսաթերթ:
Խմբագիր՝ Շողիկ Թորիկեան-Պոյաճեան

Հայաստանեայց Եկեղեցւոյ Սուրբ Յակոբ Կիրակնօրեայ Դպրոցի կամաւոր խմբակը
Ոսուցիչներ՝ Վերժին Գիւլթանեան, Թամար Գիգիթեան, Յասմիկ Նաճարեան, Գարոլ Մանուկեան, Շողիկ Նաճարեան, Աշխէն Իշխանեան, Յասմիկ Գանաճեան:
Տնօրէն՝ Թորոս Պապիկեան

Փետրուար ամսուան բացատրական տօնացոյց

Տեառնընդառաջ կամ Տեառնընդառաջ 14 Փետրուար

Տեառնընդառաջը հայաստանեայց եկեղեցոյ տէրունի տօներէն մէկն է: Ան յիշատակումն է այն օրուան, ուր քառասնօրեայ մանուկ Յիսուսը բերուեցաւ տաճար ու ընծայուեցաւ Աստուծոյ: Այս իսկ պատճառաւ, Տեառնընդառաջը անշարժ տօն մըն է ու կը զուգադիպի Սուրբ Ծնունդէն 40 օր վերջ, Փետրուար 14-ին:

Գիտէի՞ր թէ...
Տեառնընդառաջի մասին կարելի է միայն Ղուկասի աւետարանին հատուածներէն մէկուն մէջ կարդալ: Միւս աւետարանիչները չեն ակնարկած Յիսուսի կեանքի այս դէպքին:

Տեառնընդառաջի օրը եկեղեցիէն ներս կը մատուցուի պատարագ: Եկեղեցիին չորս անկիւնները կը կարդացուին աւետարանի համապատասխանող հատուածներ: Կը յիշատակուին նաեւ ծերունի Սիմոնն ու Աննա մարգարէուհին, երկու անձեր որոնք Յիսուսի տաճար ընծայման ներկայ գտնուած են:



Տեառնընդառաջը նախորդող երեկոյեան ժամերգութեան աւարտին, ծիսակատար քահանան Սուրբ սեղանին վրայի մոմերը կը վառէ եւ ներկայ հաւատացեալները այդ մոմերէն իրենց կարգին կը վառեն մոմեր ու լոյսը կը տանին տուն:

Բուն Բարեկենդան 3 Փետրուար

Բուն Բարեկենդանը այն կիրակին է որ կը նախորդէ 48 օրեր տեւող Մեծ Պահքի սկիզբը նշող կիրակին: Եւ որովհետեւ ուտիքի վերջին շաբաթն է, յատուկ ճոխութեամբ կը նշուի ան:

Բարեկենդան բառը, ինչպէս կը տեսնենք, կազմուած է երկու արմատ բառերէ՝ Բարի եւ Կենդան: Ուրախութեան օր մը ըլլալուն, ժողովրդական սովորութիւն է դիմակներով ծպտուիլն ու ուրախ տօնակատարութիւններ կազմակերպելը: Այս սովորութիւնը կը վերագրուի հեթանոսական շրջաններէն մեզի հասած սովորութեան մը:

Մեծ Պահք

Հայ եկեղեցու ծիսաշարքին համաձայն Բուն Բարեկենդանին յաջորդող Երկուշաբթին, այսինքն այս տարուան Փետրուար 4-ին, կը սկսի Մեծ Պահքի շրջանը: Ան կը տևէ 42 օրեր մինչեւ Ծաղկազարդի Կիրակին, յետոյ կը շարունակուի շաբաթ մը եւս պահքի օրերով՝ Աւագ Ծաբաթը, որու ընթացքին եկեղեցին հաւատացեալները կը պատրաստէ արժանաւորապէս եւ երկիւղածութեամբ մօտենալու Յիսուս Քրիստոսի Յարութեան տօնին: Մեծ Պահքի բոլոր կիրակիներուն բոլոր եկեղեցիներուն մէջ կը կարդացուին անտարանական առակներ, որոնք հրաւերներ են որ մարդիկ հեռանան իրենց մեղքերէն, մաքրուին եւ պատրաստ ըլլան սուրբ տօնին:

Մարդ միայն հացով չ'ապրիր...

Աւետարանին մէջ գրուած է թէ Քրիստոս իր քարոզչութիւնը սկսելէ առաջ քառասուն օր առանձնացաւ անապատ՝ աղօթքով եւ ծոմապահութեամբ ապրելու համար: «Այդ օրերուն ո՛չ կերաւ եւ ո՛չ ալ խմեց: Երբ քառասուն օրերը ամբողջացան, Յիսուս անօթեցաւ: Սատանան ըսաւ իրեն.

- Եթէ դուն Աստուծոյ որդին ես, հրամայէ՛ որ այս քարը հաց դառնայ: Յիսուս պատասխանեց.

- Օրէնքի գիրքին մէջ գրուած է. «Մարդ միայն հացով չ'ապրիր, այլ՝ Աստուծոյ բոլոր խօսքերով:»

Ղուկաս 4.2-4

Մեծ Պահքի Կիրակիները

Մեծ Պահքը ունի 7 կիրակիներ, որոնք յատուկ եւ իմաստալից անուններ ունին. անա անոնցմէ երկուքը.-

Բուն Բարեկենդան.

Մեծ Պահքին նախորդող Կիրակին է. Բարեկենդան կը նշանակէ բարի կեանք՝ աշխարհիկ իմաստով ուրախութիւն, խրախճանք, իսկ կրօնական իմաստով՝ երանելի կեանք, ինչպէս Ադամը կ'ապրէր դրախտին մէջ արտաքսուելէն առաջ:

Արտաքսման Կիրակի.

Ադամն ու Եւան իրենց անհնազանդութեան պատճառաւ երկար չի մնացին դրախտին մէջ եւ արտաքսուեցան հոնկէ: Մեզի՛ մեղաւորներուս համար Քրիստոս ապաշխարհութեամբ ցոյց տուաւ փրկութեան ճամբան, եւ դրախտին արժանանալու յոյսը:

Պահքի շրջանը իր սահմանափակումներով, մեղքերու խոստովանութեամբ, մարդը կը հասցնէ իր կատարելութեան եւ հաւատացեալներ անոր միջոցաւ կը փորձեն կիրարկել «Լերան քարոզ»-ին մէջ Յիսուսի ըսած մէկ խօսքը . «կատարեալ եղէք ձեր Երկնաւոր հօրը նման»:

Պահքը ունի երկու տեսակ առաւելութիւններ. մէկը նիւթական, միւսը հոգեկան:

Առաջինը կենդանական կերակուրներէ հրաժարիլն է իսկ երկրորդը մեղքերու քաւումը: Այս երկու տեսակները իրար կը լրացնեն եւ մէկը առանց միւսին անիմաստ է եւ անբաւարար:

Գոհութիւն Աստուծոյ շնորհքին համար



Դուն ինչո՞ւ համար փափաքն ունիս հանգիստի, դուն որ ծնած ես վաստակելու համար:

Տրամադրէ ինքզինքդ աւելի համբերութեան քան մխիթարութեան, աւելի խաշը կրել քան ուրախութիւն ճաշակել:

Ո՞վ է մարդը մահկանացու որ յօժարակամ շընդունեցաւ ուրախութիւնները եւ մխիթարութիւնները հոգեւոր, եթէ կարող էր զանոնք միշտ վայելել:

Հոգեւոր մխիթարութիւնները կը գերազանցեն ամէն վայելքներն աշխարհի, ամէն հաճոյքները մարմնաւոր:

Ամէն փափկութիւններն աշխարհի կամ սնոտի են կամ զազրոտի: Իսկ հոգեւոր մխիթարութիւնները միայն քաղցր են եւ մաքուր, կը ծնին շնորհքէն եւ Աստուած կը սփռէ զանոնք մաքուր սրտերուն մէջ:

Ոչ ոք սակայն կարող է միշտ եւ ըստ կամի վայելել աստուածային մխիթարութիւնները, որովհետեւ փորձութեան դադարը երկարատեւ չէ:

Թիւր ազատութիւնը մտքին եւ մեծ վստահութիւնը անձին վրայ, ինքնին մեծ արգելք են երկնային այցելութիւններուն:

Աստուած մեծ բարիքը կու տայ մարդուն երբ կը պարգեւէ անոր շնորհքը մխիթարութեան: Մարդը սակայն կը գործէ մեծ սխալը երբ այս պարգեւին համար չի մատուցաներ գոհութիւնն Աստուծոյ եւ բոլորովին անոր չի վերագրեր զայն:

Շնորհքը առատօրէն չի զեղուր մեր վրայ, որովհետեւ ապերախտ ենք Տուողին հանդէպ եւ չենք բարձրանար մինչեւ աղբիւրը շնորհքին:

Որովհետեւ շնորհքը երբեք չի մերժուիր անոր, որ կ'ընդունի զայն գոհութեամբ, եւ Աստուած կու տայ խոնարհին ինչ որ կը մերժէ ամբարտաւանին:

Հատուած՝ «Նմանութիւն Յիսուս Քրիստոսի» գիրքէն, Թովմաս Գեմբացի, Պէլյուֆ 1997

Եկեղեցական բառարան

Հ Ի

Հրաժարիմք

Հրաժարիմքը Մեծ Պահքի շրջանին արտասանուող խօսք մըն է որ գրաբար դարձուածքն է «կը հրաժարինք» բառին:

«Հրաժարիմք»-ը արտասանելով հաւատացեալը կը մերժէ չարը, կը հեռանայ անկէ ու մը հրաժարի անկէ: Ան կը հրաժարի չարին բոլոր տեսակի խաբէութիւններէն, չար մտածումներէն եւ չար գործերէն:

«Հրաժարիմք ի Սատանայէ, եւ ամենայն խաբէութենէ նորա, ի պատրանաց նորա, ի խորհրդոց նորա, ի զնացից նորա, ի չար կամաց նորա, ի չար հրեշտակաց նորա, ի չար պաշտօնէից նորա, ի չար կամարարաց նորա եւ յամենայն չար զօրութենէ նորա՝ հրաժարելով հրաժարիմք:

Ձ ձ

Ձեռագիր մատեան

Հայ գրիչներու կողմէ արտագրուած գիրքերը կը կոչուին ձեռագիր մատեաններ: Ձեռագիր մատեանները 6, 8, 12 եւ 16 թերթ ունեցող տետրակներ են որոնց էջերը իրար կարուելով ստացած են գիրքի ձեւ: Անոնք գրուած են մագաղաթի կամ թուղթի վրայ: Մագաղաթի վրայ գրուած ամենէն հին ձեռագիր մատեանը պահպանուած է Երեւանի մատենադարանին մէջ եւ ծանօթ է «Վեհամօր աւետարան» անունին տակ: Թուղթէ պատրաստուած ամենէն հին ձեռագիր մատեանները 981 թուին կը վերագրուին իսկ ամենէն նորերը ստեղծուած են 14-րդ դարուն:



Խօսքն Աստուծոյ

Անառակ որդիին առակը «Ղուկաս 15.11-32»
Անառակի կիրակիին առիթով, 17 Փետրուար

Մարդ մը երկու զաւակ ունէր: Կրտսերը հօրը ըսաւ .

- «Հայր, քու ստացուածքէդ ինծի ինկած բաժինը հիմա՛ տուր ինծի»: Եւ հայրը իր զաւակներուն միջեւ բաժնեց իր ունեցածը: Քանի մը օր ետք, կրտսեր զաւակը առաւ իր ամբողջ հարստութիւնը եւ հեռու երկիր մը գնաց: Հոն անառակ կեանք մը ապրելով՝ մսխեց հարստութիւնը եւ սպառեց իր ամբողջ ունեցածը:

Պատահեցաւ որ այդ երկրին մէջ մեծ սով մը տիրեց, երբ արդէն ինք սկսած էր աղքատանալ: Ուստի գնաց այդ երկրի քաղաքացիներէն մէկուն քով ծառայ եղաւ եւ անիկա իր ազարակը դրկեց զինք՝ խոզ արածելու համար: Նոյնիսկ պատրաստ էր խոզերուն կերած եղջիրներէն իր փորը լեցնելու, սակայն ոչ ոք կու տար իրեն: «Հօրս տան մէջ քանի՛ գործաւորներ կան, որոնք իրենց պէտք եղած կերակուրէն աւելին ունին, մինչ ես հոս անօթութենէ կը մեռնիմ: Ելլեմ երթամ հօրս քով եւ ըսեմ իրեն.- Հայր, մեղանչեցի Աստուծոյ եւ քեզի դէմ. այլեւս արժանի չեմ քու որդիդ կոչուելու. զիս քու գործաւորներէդ մէկը նկատէ»: Ապա ելաւ եւ հօրը քով գնաց:

Տակաւին տունէն բաւական հեռու էր, երբ հայրը տեսաւ զինք ու գթաց. վազելով դիմաւորեց զայն, վիզին փաթթուեցաւ եւ համբուրեց: Որդին հօրը ըսաւ. «Հայր մեղանչեցի Աստուծոյ եւ քեզի դէմ. այլեւս արժանի չեմ քու որդիդ կոչուելու:» Հայրը իր ծառաներուն հրամայեց. «Անմիջապէս բերէք լաւագոյն պատմունանը եւ հագցուցէք իրեն. մատանի անցուցէք իր մատին եւ կօշիկ տուէք իրեն: Բերէ՛ք պարարտ հորթը, մորթեցէք, ուտենք եւ ուրախանանք: Որովհետեւ իմ այս զաւակս մեռած էր՝ ողջնցաւ, կորսուած էր՝ գտնուեցաւ»: Եւ սկսան խրախճանքի:

Մինչ այդ, երէց զաւակը ազարակ կը գտնուէր: Վերադարձին, երբ տան մօտեցաւ, երգի ու պարի ձայներ լսեց: Կանչեց ծառաներէն մէկը եւ հարցուց թէ ի՛նչ կայ: Ծառան ըսաւ իրեն. «Եղբայրդ եկաւ, եւ որովհետեւ ողջ առողջ վերադարձաւ, հայրդ պարարտ հորթը մորթեց:» Երէց եղբայրը զայրացաւ եւ չուզեց ներս մտնել: Այս մասին իմանալով, հայրը դուրս ելաւ եւ աղաչեց որ ներս մտնէ: Իսկ անիկա պատասխանեց. «Տարիներէ ի վեր քեզի կը ծառայեմ. ոեւէ մէկ հրահանգդ չանտեսեցի, եւ սակայն նոյնիսկ ուլ մը չտուիր ինծի, որ ուրախանայի բարեկամներուս հետ: Մինչդեռ, երբ եկաւ այդ որդիդ, որ քու ստացուածքդ պոռնիկներուն հետ մսխեց, պարարտ հորթը մորթեցիր անոր համար»: Հայրը ըսաւ. «Տղա՛ս, դուն միշտ ինծի հետ ես եւ ամբողջ ունեցածս քուկդ է: Սակայն հիմա պէտք է ուրախանանք եւ ցնծանք, որովհետեւ այս եղբայրդ մեռած էր՝ ողջնցաւ, կորսուած էր՝ գտնուեցաւ»:

Աստուածաշունչը մանուկներու համար Ղազարոսի Յարութիւնը



Հիւանդ մէկը կար,
Ղազարոս անունով, որ
Բեթանիայէն էր: Ան Յիսուսի
բարեկամ էր:
Ղազարոսի քոյրերը՝ Մարթան եւ
Մարիամը մարդ ղրկեցին
Յիսուսի մօտ, որպէսզի անոր
ըսեն՝

- Տէր, քու սիրելի բարեկամդ հիւանդ է:
Երբ Յիսուս այս լսեց ըսաւ՝

- Այս հիւանդութիւնը պիտի ծառայէ որ հրաշք մը
պատահի եւ Աստուծոյ անունը փառաւորուի:
Սակայն փոխանակ անմիջապէս երթալու երկու օր սպասեց
ապա ըսաւ աշակերտներուն՝

- Եկէ՛ք կրկին Հրէաստան երթանք
Աշակերտները մտահոգ էին եւ կը փորձէին Յիսուսի կեցնել
ըսելով «Տէր, Հրէաստանցիները դեռ նոր կ'ուզէին քեզ



քարկոծել, հիմա կրկին հոն
կ'երթաս:»

Երբ ժամանակն էր երթալու
Յիսուս ըսաւ աշակերտներուն
- Մեր բարեկամը՝ Ղազարոս
քնացած է, երթամ արթնցնեմ
զինք:



Աշակերտները պատասխանեցին

- Եթէ քնացած է՝ ուրեմն կ'առողջանայ:

Յիսուս ըսաւ՝ «Ըսել կ'ուզեմ որ Ղազարոս մեռաւ»:

Երբ Յիսուս Հրէաստան հասաւ, Մարթան մօտեցաւ անոր ու ըսաւ.

- Եթէ հոս ըլլայիր եղբայրս չէր մեռներ:

Յիսուս անոր պատասխանեց.

- Եղբայրդ դարձեալ պիտի ապրի: Ես եմ յարութիւնը եւ կեանքը, ան որ ինձի հաւատայ, նոյնիսկ եթէ մեռնի՝ պիտի ապրի:

Յիսուս գնաց գերեզման, քարայրի մուտքը բանալ տուաւ ու ըսաւ Մարթային

- Եթէ հաւատաս՝ Ասուծոյ փառքը պիտի տեսնես:

Յիսուս աչքերը վեր բարձրացուց եւ ըսաւ՝

- Շնորհակալութիւն Քեզի՝ որ լսեցիր իմ աղօթքս: Գիտեմ որ միշտ կը լսես զիս. բայց այս կ'ըսեմ շուրջի ժողովուրդին համար որ անոնք գիտնան որ դուն զիս ղրկեցիր:



Ապա բարձր ձայնով կանչեց. – Ղազարոս, դուրս եկուր:

Ու Ղազարոս դուրս ելաւ՝ ոտքերն ու ձեռքերը պատանքով փաթթուած եւ երեսը ծածկուած:

Յիսուս ըսաւ.

- Քակեցէ՛ք պատանքը եւ ձգեցէք որ երթայ:



Եզակի գիրեր
Հայերէն գիրերով Sudoku

| | | | | | | | | |
|---|---|---|---|---|---|---|---|---|
| է | ե | թ | ը | գ | զ | դ | բ | ա |
| ա | դ | գ | թ | բ | ե | ը | է | զ |
| բ | զ | ը | դ | ա | է | թ | ե | գ |
| ե | է | զ | ա | դ | թ | գ | ը | բ |
| գ | թ | բ | ե | է | ը | ա | զ | դ |
| դ | ը | ա | գ | զ | բ | ե | թ | է |
| զ | ա | ե | բ | թ | դ | է | զ | ը |
| ը | բ | դ | է | ե | գ | զ | ա | թ |
| թ | գ | է | զ | ը | ա | բ | դ | ե |

| | | | | | | | | |
|---|---|---|---|---|---|---|---|---|
| ա | | | | | | | է | զ |
| | ե | զ | թ | է | գ | | | |
| է | | թ | | ա | բ | | | |
| թ | ա | բ | | գ | ե | է | զ | ը |
| գ | | ե | ը | զ | | | | ա |
| զ | | ը | | | ա | գ | դ | ե |
| ը | թ | | է | ե | զ | դ | | գ |
| բ | | | ա | | | զ | ե | է |
| ե | զ | է | գ | | դ | | ը | թ |

Նախորդ «Եզակի գիրեր» ուն լուծումը

Ամբողջացուր քառակուսիները գործածելով ա, բ, գ, դ, ե, զ, է, ը, թ գիրերը պայմանաւ որ միայն մէկ անգամ գործածես իւրաքանչիւր գիր իւրաքանչիւր՝

- հորիզոնական գիծի վրայ,
- ուղղահայեաց գիծի վրայ եւ
- ինեակ քառակուսիի մէջ

Ռ՞րն է ճիշդ պատասխանը

Յունուար ամսուան պատասխանները

Մանկապարտէզի անկիւն
Հովիւներ, հրեշտակը, աւետիս, Փրկիչը,
Օծեալ, խանձարուրով, խաղաղութի՛ւն,
հաճութիւն

Նախակրթարան Ա. Բ. Գ. անկիւն

1. գ. Յունուար 13
2. անուանակոչութիւն
3. ա. Յունուար 6
4. բ. Զուր
5. բ. Յովհաննէս Մկրտիչին
6. գ. խթում
7. դ. Մսուրիւն մէջ
8. ա. Յունուար 6 ի պատարագի արարողութենէն ետք
9. բ. Յունուար 5 ի երեկոյեան
10. բ. Երկուշաբթի՝ Յունուար 21
11. գ. Հինգշաբթի՝ Յունուար 31

Նախակրթարան Դ. Ե. Զ. անկիւն

1. գ. Յունուար 13
2. ա. ոսկի, բ. կնդրուկ, գ. զմուռ
3. Հերովդէս
4. Օգոստոս
5. ա. Ս. Ծնունդ

6. բ. Շաբաթ, 12 օր առաջ
7. Հինգշաբթի, Յունուար 31
8. Երեքշաբթի, Յունուար 29
9. Ընդհանրական
10. ա. խօսքով, բ. վարմունքով, գ. սիրով, դ. հաւատքով, ե. մաքուր կենցաղով

Երկրորդականի անկիւն

1. ա. Յունուար 6
2. բ. 451 Քաղկեդոնի ժողովին
3. Առաջաւորաց պահք
4. ա. Ս. Ծնունդ, բ. Անուանակոչութիւն, գ. Յովհաննու Կարապետ, դ. Ս. Սարգիս, ե. Ղեւոնդեանց, զ. Վարդանանց, է. Բուն Բարեկենդան
5. ա. Ս. Ծնունդ, բ. Ս. Յարութիւն, գ. Պաշտօնակերպութիւն, դ. Ս. Աստուածածնի վերափոխում, ե. Խաչվերաց
6. Քրիստոնէական Դաստիարակութեան
7. Վարդանանց
8. Ղեւոնդեանց
9. Կաթողիկէ
10. ա. խօսքով, բ. վարմունքով, գ. սիրով, դ. հաւատքով, ե. մաքուր կենցաղով

Ո՞րն է ճիշդ պատասխանը Մանկաատուէտի անկիւն



Յիսուսի տաճար ընծայումը
«Տեառնընդառաջ,
Փետրուար 14»

Ամբողջացո՛ւր ըստ
Ղուկաս 2.22- 32

Տիրոջ, Գուրբուրի,
տատրակ, աղաւնիի,
Սիմոն, Սուրբ Հոգիին,
Օծեալը, Յիսուսը,
գոհաբանեց

Յովսէփին ու Մարիամը մանուկը Երուսաղէմ տարին ----- ընծայելու
համար որովհետեւ Տիրոջ Օրէնքին մէջ գրուած է. «Տիրոջ պէտք է -----
ամէն արու զաւակ, որ մօր առաջին զաւակն է». ինչպէս նաեւ Տիրոջ
Օրէնքին համաձայն զոհ մատուցանելու զոյգ մը ----- կամ
----- երկու ձագ:

Այդ ժամանակ Երուսաղէմի մէջ ----- անունով մարդ մը կ'ապրէր:
Սիմոն արդար եւ աստուածավախ մարդ մըն էր, -----
իրեն հետ էր եւ վստահեցուցած էր զինք՝ թէ Տիրոջ ----- չտեսած
պիտի չմեռներ: Արդ, Սուրբ Հոգիէն առաջնորդուած՝ անկա տաճար
գնաց: Երբ ծնողքը մանուկ ----- տաճար բերին, որպէսզի կատարեն
այն ինչ որ Օրէնքը կը պահանջէր մանուկին համար, Սիմոն իր գիրկը
առաւ փոքրիկը եւ ----- զԱստուած:

Ո՞րն է ճիշդ պատասխանը
Նախակրթարան Ա. Բ. եւ Գ. դասարաններու անկիւն

Անուն: _____

- 1.- Յիսուսի ծնունդէն քանի՞ օր ետք զԻնք տաճար բերին Տիրոջ նուիրելու:
- ա.- 8
- բ.- 20
- գ.- 40
- դ.- 451

- 2.- Ո՞ր թուականին տեղի ունեցաւ Վարդանանց պատերազմը:
- ա.- 484
- բ.- 303
- գ.- 301
- դ.- 451

- 3.- Սուրբ Սարգիս ի՞նչ գործ կ'ըներ:
- ա.- Զօրավար էր
- բ.- Զկնորս էր
- գ.- Հովիւ էր
- դ.- Բժիշկ էր

- 4.- Էջ 14-16 ի Յիսուսի ըրած հրաշքին մէջ Յիսուս որո՞ւն ըսաւ «Դուրս եկուր»:

- 5.- Սուրբ Վարդանանց տօնին յաջորդող Կիրակին ի՞նչ կը կոչուի:

- 6. Վարդանանցէն երկու օր առաջ ի՞նչ կը տօնենք:

- Ա.Սուրբ Սարգիս
- Բ.Սուրբ Սահակ Պարթեւ
- Գ.Սուրբ Ղեւոնդեանց Քահանայից
- Դ.Տեառնընդառաջ

- 7. Ի՞նչ կը նշանակէ Բարեկենդան:
- ա.- Բարի լուր
- բ.- Բարի կեանք
- գ.- Վարդանանք
- դ.- Halloween

- 8. Բուն Բարեկենդանին յաջորդ օրը ի՞նչ կը սկսի:

- 9. Պահքի առաջին Կիրակին կը կոչուի Բուն Բարեկենդան: Ի՞նչ կը կոչուի երկրորդ Կիրակին:

Ա-տ-ք-մ-ն

- 10. Պահքի առաջին Կիրակին կը կոչուի Բուն Բարեկենդան: Ի՞նչ կը կոչուի երրորդ Կիրակին:

Ա-ա-ա-ի-

Ո՞րն է ճիշդ պատասխանը
Նախակրթարան Դ. Ե. եւ Զ. դասարաններու անկիւն

Անուն: _____

1.- Հայաստանեայց Եկեղեցին ի՞նչ կը տօնէ Փետրուար 14 ին:

ա.- Տեառնընդառաջ

բ.- Վարդանանք

գ.- St. Valentine

դ.- Գոհաբանութեան օր

2.- ա. Յունուար 6ը հաշուելով որպէս առաջին օր, Փետրուարի ո՞ր օրը Յիսուս առաջին անգամ տաճար բերին:

ա.- 12

բ.- 13

գ.- 14

դ.- 15

3.- Յիսուս իր քարոզչութիւնը սկսելէ առաջ անապատին մէջ քանի՞ օր ծոմ պահեց:

ա.- 8

բ.- 20

գ.- 40

դ.- 451

4.- Մեծ պահքի առաջին շաբաթ օրը ո՞ր սուրբին տօնը կը յիշատակենք:

5. Ո՞վ էր Ս. Վարդան Մամիկոնեանին մեծ հաչրը «մօրը կողմէ»:

6. Ե՞րբ կը սկսի Մեծ Պահքը «երկու շիտակ պատասխան»:

Ա. Վարդանանցի յաջորդող Երկուշաբթին

Բ.Բուն բարեկենդանին յաջորդող Երկուշաբթին

Գ.Վարդանանցի յաջորդող Չորեքշաբթին

Դ.Բուն բարեկենդանին յաջորդող Չորեքշաբթին

7. Ո՞ր շարականը կ'երգենք Վարդանանցին:

8. Ո՞վ գրած է «Վարդանի եւ Հայոց Պատերազմի մասին» երկը:

9. Ի՞նչ կը կոչուի Բուն Բարեկենդանին յաջորդող Կիրակին:

10. Ի՞նչ կը կոչուի Բուն Բարեկենդանէն ետք եկող երկրորդ Կիրակին:

**Ո՞րն է ճիշդ պատասխանը
Երկրորդականի անկիւն**

Անուն: _____

1- Վարդանանց ճակատամարտի տարին տեղի ունեցաւ 4րդ տիեզերական ժողովը որ հետագային մերժուեցաւ Հայերուն կողմէ: Ո՞ր տեղի ունեցաւ այդ ժողովը:

2- Վարդանանց ճակատամարտէն 33 տարիներ ետք Վահան Մամիկոնեան Պարսիկներուն հետ ստորագրեց դաշնագիր մը որ Հայ ժողովուրդին տուաւ ինքնավարութիւն, Հայ Եկեղեցիին տուաւ ազատ գործելու իրաւունք եւ քանդելու կառուցուած ատրուշանները: Ո՞ր ստորագրուեցաւ այդ դաշնագիրը

3-Հայ Եկեղեցին Փետրուարի ո՞ր օրը կը տօնէ Յիսուսի Տաճար ընծայումը:

4-Սուրբ Սարգիսի նախորդող Երկուշաբթիէն Ուրբաթ օրերը պահք են: Ի՞նչ կը կոչուի այս 5 օրուան պահքը:

5-Տարուան ո՞ր 4 օրերը Ճաշու գիրք չի կարդացուիր:

6- Թիւ 5 հարցումին մէջ նշուած 4 օրերուն յաջորդող օրը Հին Կտակարանի ո՞ր մարգարէին գիրքն է Ճաշու ընթերցումը:

7- Ե՞րբ տեղի ունեցաւ Տիեզերական այն ժողովը, որուն մասնակից 150 հայրապետներուն տօնը այս տարի կը տօնենք Փետրուար 2 ին:

8- Յիսուս քանի՞ օրուան մանուկ էր երբ Տաճար ընծայուեցաւ:

9.- Ամբողջացուր
**ՔԱՆԶԻ ՀԱՅՐ ՄԵՐ
ԶՍՈՒՐԲ**

**ԳԻՏԵՄՔ ԵՒ ՄԱՅՐ
ԶԱՌԱՔԵԼԱԿԱՆ**

ԿԱԹՈՂԻԿԷ

10.- Ո՞ր ականատես սուրբը գրեց Վարդանանց Պատերազմին նկարագրականը:

Կարճ լուրեր Կիրակնօրեայէն

Փետրուար 3 Ին Կիրակնօրեայ Դպրոցը կը տօնէ Վարդանանք եւ Բուն Բարեկենդան, ուր աշակերտները կը ծափուին Հայկական Տարազներով:

Այս տարուան պահքի առաջարկուած ծոմապահութիւնը հետեւեալն է:

- Փետրուար 4 - 10 Ծամոն
- Փետրուար 11 - 17 Հեռատեսիլ, Համակարգիչ, այլ պաստառով խաղեր
- Փետրուար 18 - 24 Ծաքար
- Փետրուար 25 - Մարտ 2 Կազային խմիչքներ (pepsi, 7up, coke, crush)
- Մարտ 3 - 9 Կոլոնատ, տուրմ
- Մարտ 10 - 16 Chips
- Մարտ 17 - 22 Հակիթ

Այս տարուան պահքի ընթացքին սորվելիքները հետեւեալներն են:

Մանկապարտէզի Ա. Բ. եւ Գ. Եւ Նախակրթարանի Ա.

Անսխալ գոց սորվիլ Խաչակնքել, Տէրունական Աղօթքը եւ Հաւատով Խոստովանիմէն համարներ :

Նախակրթարանի Բ., Գ., Դ.

Անսխալ գոց սորվիլ Հաւատով Խոստովանիմի առաջին 12 համարները:

Նախակրթարանի Ե. եւ Զ.

Գոց սորվիլ Նոր Կտակարանի Գիրքերու շարքը, կարդալ Մարկոսի Աւետարանը Երկրորդական

Գոց սորվիլ Ա. Սաղմոսը, Նոր Կտակարանի Գիրքերու Ծարքը, եւ կարդալ Մարկոսի Աւետարանը

«ՄԱՇՏՈՑԻ ԱՐՁԱԳԱՆԳ»Ի

Ներկայ եւ նախկին թիւերը կը գտնուին նաեւ համացանցի վրայ:
Այցելեցէ՛ք www.sourphagop.org հասցէն եւ ընտրեցէ՛ք Պարբերաթերթ բաժանումը:

ՏԵԱՌՆԸՆԴԻԱՌԱԶ

Հինգշաբթի, 14
Փետրուար 2007
Երեկոյեան
Փամերգութիւն
Փամը 7:30 ին

Փետրուար 2008

- 3 Բուն Բարեկենդան
- 4 Ա. օր Մեծ Պահքի
- 9 Ս. Թէոդորոս Զօրավար
- 10 Արտաքսման
- 14 Տեառնընդառաջ
- 17 Անառակի
- 23 Ս. Յովհաննէս Երուսաղիմայ հայրապետ, Յովհաննէս Օձնեցի, Յովհաննէս Որոտնեցի, Գրիգոր Տաթևացի
- 24 Տնտեսի
- 27 Միջինք Մեծ Պահքի